

Dithero tsa Tirelano mo Kutlwanong

35/2015 Thero ka Sontaga wa 3 morago ga moletlo wa Borarobongwe, e le ka 21. 06. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go Luka 19:10, le re: "Gonne Morwa-Motho o tsile go batla le go pholosa se se latlhegileng."

1. Sefela sa 255 - 237/247
2. **Thapelo:** Rara yo o mo legodimong, o re itshepise mo boammaaruri. Lefoko la gago ke la boammaaruri. Amen.
3. Lefoko la Testamente e kgologolo le kwadilwe mo go Hes. 18:1-4. 21-24. 30-42;
Epistolo ka fa thulaganyong ya 2 e kwadilwe mo go 1 Timotheo 1:12-17;
Efangele ka fa thulaganyong ya 3 e kwadilwe mo go Luka 15:1-3.11b-32.
4. A go ipolelwe tumelo ya bokeresete!
5. Sefela sa 219 - 204/213
6. Thapelo ya mmadi wa thero.
7. **Efangele** ka fa thulaganyong ya 1 e kwadilwe mo go Luka 15:1-10, e re: "Jaanong bakgethisi botlhe le baleofi ba nna ba tla go mo utlwa. Mme Bafarisai le Baitse-dikwalo ba ngongorega ba re: 'Yo, o tshola baleofi, o ja nabo.' Ke fa Jesu a ba bolelela setshwantsho se a re: 'Motho ke ofe mo go lona, yo e ka reng a na le dinku di le lekgolo, a timelelwa ke e le nngwe ya tsona, a se ka a tlogela tse di 99 kwa sekakeng, a latela e e timetseng go tsamaya a e bone? Mme e re a sena go e bona, a e bee mo magetleng a gagwe, a itumele. Mme e re a tla mo gae, a phuthe ditsala le ba ba agileng nae, a ba ree a re: 'Itumeleng le nna; ka gonne ke bonye nku ya me e e neng e timetse.' Ke lo raya ke re: Go tla nna boitumelo jalo mo legodimong ka ga moleofi a le mongwe fela yo o sokologang, bogolo go basiami ba le 99, ba go sa batlegeng tshokologo mo go bone. Gongwe mosadi ke ofe yo e ka reng a na le

diselefera di le some, a latlhegelwa ke selefera e le nngwe fela, a se ka a tshuba lobone, a feela ntlo, a batla ka tlhoafalo go tsamaya a e bone? Mme e re a sena go e bona, a phuthe ditsala le ba ba agileng nae a re: 'Itumeleng le nna; gonne ke bonye selefera e e neng e ntatlhegetse.' Ke lo raya ke re: Go boitumelo jalo mo baengeleng ba Modimo ka ga moleofi a le mongwe yo o sokologang.'" Amen.

8. Thero: Phuthego ya ga Jesu Keresete, re utlwile Efangele e ntle e. "Ke lo raya ke re: Go tla nna boitumelo jalo mo legodimong ka ga moleofi a le mongwe fela yo o sokologang." Mo Efangeleng e re buisa lereo la "go itumela" ga tlhano. Kgaolo yotlhe ya ga Luka 15 e tletse ka boitumelo. Thapama lo nne fa fatshe, lo tlhatlobe, lo buise ka boitumelo joo, lo kopane le jona. Kana ke kakanyo e ntle mo go nna. Ba itumela mo legodimong. Ba itumela mo pusong ya legodimo. Baengele ba legodimo ba a tshega, gonne Tiedemann o bonywe ke Mopholosi wa gagwe. Phuthego yotlhe ya mo legodimong e a opela, e itumetse, gonne nna moleofi o o tlhomolang pelo, yo ke kileng ka latlhega, le go nna ka fa tlase ga katlholo ya go latlha ke bonywe, ke buseditswe gae, ke pholositswe. Ke ntshitswe mo logageng lwa me. Ka gogwa gore ke tswe kwa ke neng ka iphitlha teng, le go timela, le go tshaba teng, kwa ke neng ka timediwang teng.

Ga bewa ditlhogwana mo godimo ga ditiragalo tsa kgaolo eo tse di reng: "Setshwantsho wa nku e e timetseng, sa seleferta e e latlhegileng, le sa Morwa yo o latlhegileng. Ke lona letlhogonolo la rona. Ke ka ntlha ya moo, fa Jesu Keresete a ne a fologa mo legodimong, a tlogela baengele, a tla mo go rona mono mo lefatsheng. Ke ka ntlha ya moo, fa a ne a boga, a ketekilwe, a nyadiwa, a sotliwa, a tlhowiwa mo go kalo. Ke ka ntlha ya moo, fa a ne a bapolelwa mo sefapaanong ka dipekere tse tharo, a lepelelwa mo logonnyeng lwa thogako letsatsi lotlhe, a swela teng mo felong ga logata. Ke ka ntlha ya moo fa a ne a swela baleofi loso lwa senokwane kwa Golegotha ka ntlha ya maleo a rona. Ke gona a fentseng loso le Satane le molete wa molelo, a tsoga mo baswing ka letsatsi la boraro go re baakanyetsa tshiamo ya Modimo e re e balelwa ka go dumela mo go Keresete, a ikagela kereke ya gagwe ka go goromeletsa Mowa o o Boitshepo mo barutweng ba gagwe, a romela barutwa ba gagwe mo mafatsheng otlhe. Ke ka ntlha ya moo o sa ntse a roma barongwa ba gagwe gore a re gogele mo pholosong le mo botshelong jo bo sa khutleng. A go lebogwe Modimo yo o sa ntseng a batla, le go senka ba ba timetseng, ba ba

letlhegileng. Ke a dumela gore ga nka ke ka dumela mo go Jesu Keresete Morena wa me, le e seng go tla mo go ene ka thata le ka tlhaloganyo ya me. Buisa tiragalo ya nku ele e e neng e latlhega, le selefera se se neng sa latlhega. Di ne di latelwa, go ya modisa yo o molemo le mosadi yole ba di bone. Ke gona ke ipolelang ka go leboga, ke ipolela ka boitumelo jo bogolo, ke re: INdodana kaNkulunkulu ya amogela baleofi, ya ja le bone.

Lefoko le le okamelang beke eno e re: "Gonne Morwa-Motho o tsile go batla le go pholosa se se latlhegileng," Luka 19:10. A go lebogwe Modimo, fa go ntse jalo. O mpatlile, a ntshenka, ka maleo a me a ne a le a le mantsi jaaka mošawa wa letshitshi, le dithiri mo tlhogong ya me. Mopholosi o a ntlhagisa, a ntsosa, a nkgoga. A re atameleng gore re utlwe sentle! "Jaanong bakgethisi botlhe le baleofi ba nna ba tla go mo utlwa. Mme Bafarisai le Baitse-dikwalo ba ngongorega ba re: 'Yo, o tshola baleofi, o ja nabo.' Ke fa Jesu a ba bolelela setshwantsho se a re: 'Motho ke ofe mo go lona, yo e ka reng a na le dinku di le lekgolo, a timelelwa ke e le nngwe ya tsona, a se ka a tlogela tse di 99 kwa sekakeng, a latela e e timetseng go tsamaya a e bone? Mme e re a sena go e bona, a e bee mo magetleng a gagwe, a itumele. Mme e re a tla mo gae, a phuthe ditsala le ba ba agileng nae, a ba ree a re: 'Itumeleng le nna; ka gonne ke bonye nku ya me e e e neng e timetse.' Ke lo raya ke re: Go tla nna boitumelo jalo mo legodimong ka ga moleofi a le mongwe fela yo o sokologang, bogolo go basiami ba le 99, ba go sa batlegeng tshokologo mo go bone.'"

Boitumelo joo bo rata go tsena mo pelong ya me le mo go ya gago jaanong. Bo rata go tlatša mewa ya rona. Boitumelo jo jwa Modimo bo rata go nnela ruri mono mo phuthegong, bo rata go tlatša malapa a rona, ba re lebetse boitumelo jwa Morena, le bone ba ba dumelelang Satane gore a tlatse ditlhogo tsa bone ka dikhutsafalo tsa gagwe tsa bogologolo. Maleo otlhe a a hutsafatsa. A ga re itse, fa go le jalo? Bosula jotlhe bo a hutsafatsa. A re lebetse tseo? Mo tsamaong fa gare ga batho di a bonala gantsi. Go bua maaka le go tsietsa go a hutsafatsa. Ditshebo le ditshotlo di a hutsafatsa. Go akanya tse di bosula, le go eleletsa yo mongwe se se bosula go a hutsafatsa. Boikgogomoso le boikgantsho bo a hutsafatsa. Go utlwiswa botlhoko le go bolaelana go a hutsafatsa. Go gapa, go thopa, go utswa go a hutsafatsa. Megopolo e e maswe, mafoko a a bosula, ditiro tse di bosula di a hutsafatsa.

Botshelo jo bo botlhofo jo bo tshelwang ntle le Modimo bo a hutsafatsa. Botshelo jo bo nyatsang thato ya Modimo bo a hutsafatsa, botshelo jo bo tsietsang, jwa go eletsa madi bo a hutsafatsa, go senya mmele le mowa go a hutsafatsa. Tlogelang tse di lo hutsafatsang, lo se ka lwa hutsafatsa ba bangwe. Kgethang boitumelo! Satane o hutsafatsa ka metlha, ke rraagwe khutsafatso yotlhe. Ga go na boitumelo jo bo nnelang ruri mo pusong ya gagwe. Ga go na boitumelo mo moleteng wa molelo. Kgaoganang le ditiro tsa gagwe motshegare le bosigo, lo kgaogane le mekgwe yotlhe ya gagwe. O tswe kwa mowa wa gago o bolawang ke serame teng. O se direle ba ba sa tlholeng ba tshela, o tla hutsafadiwa ke bone, ke mabitla otlhe. Kana mo go ona le mebele ya lona e tla bola teng. Bowa, o tle o obamele, o khubame ka mangwele mo boipobolong, teng o tla gomodiwa teng. Modimo o re setse morago kajeno, o re lekotse kajeno, o a re bitsa, ua re kopa, o a re goga,

gore re nne le kagiso le Modimo o e leng tlhogo mo go tsotlhe tse di ka nnang teng, gore re nne le kagiso le Motlhodi wa rona. Ka maikaelelo ao go batliwa boitshwarelo jwa maleo a rona. Ka jona re abelwa tshieamli ya go tshela fa pele ga ona ka tshiamo, le ka boitsheko, le ka boitumelo jwa botlalo jo bo sa feleng. Re na le mabaka a mogoloa go itumela, fa melato ya maabane le ya kajeno a itshwarelwa. Modimo o re direla ka tseo ka bopelotlhomogi, le ka bopelonolo, ka e le Rara le Modimo wa rona, rona re se na tshiamo le e seng boitshepo ka borona. O a re laletsa, a re: Tlaang jaanong! Ke tla lo tshegetsatsa, ke tla lo thusa, ke tla lo supetsa se se botoka se se fetang diphupu tse di tshididi, sengwe se se botoka le diphupu. Ke tla lo isa mo sefubeng sa ga Aborahama gore mewa ya lona e e tlhomolang pelo e bone taploso le kagiso e e sa feleng. Ba lo letela mo legdoimogn, ga rata go re bona rotlhe, ke raya botlhe ba e leng basupi ba ba sa balweng ba ba neng ba swela mo Moreneng. Ke a lo boelela, ke re: Go tla nna boitumelo fa pele ga baengele ba Modimo ka moleofi a le mongwe fela yo o sokologang. Yo o nang le ditsebe go utlwa, a a utlwe! Amen.

9. Thapelo: Rara yo o rategang wa rona, re a leboga, re a go leboga, ka o re file Morwao Jesu Keresete gore re tshele. Tsosetsa dipelo tsa rona gore re itshwarelele mo go wena. Amen.

Thapelo ya Morena: Rara wa rona yo o mo legodimong ...

10. Sefela sa 216 - 201/209

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.